



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

tiryimyim@aolima

tir yimyim

TAPAK 3

Rahul Gandhi-i Centre dang temenok agütsütsü akhang

Assam CM-i ex-NDFB züngsem 1,669 nem senotsü teyari agütsü

VOL. XIX NO. 61 (ADOK 61) DIMAPUR RASEMNÜ (WEDNESDAY) LUCHII (DECEMBER) 08, 2021 ₹ 5.00

Tai maketer tepsetba atema mang ayangtsü: NSCN/GPRN

Dimapur, December 7, 2021 (TYO): Tasümaït aser nisung tepsettsü renema aliba Indian Army-i December 4, 2021 nü Mon district kübok Oting nunger tepsetba kibongtem den mang ayimer aser tai maketertem tepsetba atema onoki mang ayangtsü ta NSCN/GPRN, Naga Army-i metetdaksü. NSCN/GPRN indang Naga Army-i asür kibong ajak den asüku lemsateper, ta Maj. Gen. Langnyie Konyak, General Staff Office- I (D), NSCN/GPRN, Naga Army-i sangdong ka nunga ashi. India sepaitemi asen lima nung arua timtem agütsür aser tashiyim mapa inyaker saka Naga

nungeri yimjung nung linüba mechi onok aremzüka arur pai metetdaksü. Naga nungeri yimjung aginür saka asen lima atsünga arua aliba India mitkartemi asen alizüng metongdaksür. Parnoki tetsürtem dak tashiyim agi shi nung medemba, nisung tepsetba aser mapang shia tebang agi meshitba timtem agütsüba dak alaka tajung kecha meinyaker ta Naga Army-i sangdong nung shia lir. Anungji tai maket azütokshiba atema Naga Army-i mang ayangtsü aser onoki iba mapa inyakdang asen nüburtemi angatetsü imlar, ta parnokisa metetdaksü.

COVID-19 Nagaland: 2 dak putet & 3 taneptsü angu

Kohima, December 7, 2021 (TYO): Mongulbarnü Nagaland nung nisung ana dak COVID-19 putet aser asem taneptsü angu. Tanü tashi nung nisung 32,142 dak COVID-19 putetogo. "Tanü COVID-19 puteter aser taneptsü angur ajak Dimapur nungi lir" ta Integrated Disease Surveillance Project atema State Nodal Officer Dr Nyanthung Kikon-i ashi. Taneptsü angur nisung 30,259 alitsü aser ibaj taneptsü agur 94.14% lir. Tang Nagaland nung nisung 118 anepaludar saka parnok 17 dakbo 97 dakbo shirangba yimya kecha mali, ta pai ashi. Tanü agi anogo asembuba COVID-19 ajanga asü-amaba mali, anungji tang tashi nung nisung 699 süogo, ta Dr. Kikon-isa shisem. Tanü tashi nung sample

4,14,390 tendangogo. RT-PCR ajanga 111,620, TrueNat ajanga 88,982 aser Rapid Antigen Test ajanga 2,13,788 tendang, ta Dr paisa metetdaksü. "Hombarnü tashi nung nisung 746,328 nem COVID-19 vaccine indang 13,02,309 dose agütsüogo" ta State Immunization Officer, Dr Ritu Thurr-ia metetdaksü. Vaccine agirtem ya frontline workers 60,982, healthcare workers 15,999, arishi küm 45 ser tempur 210,998 aser arishi küm 18 nungi 44 tsüngda alir nisung 455,926 lir, ta pai ashi. "Parnok rongnungi nisung 555,981-i dose anaprong agiogo. Parnok ya frontline workers 48,555, healthcare workers 13,521, arishi küm 45 nungi tempur 174,615 aser arishi küm 18 nungi 44 tsüngda alir 319,290 lir" ta Dr Thurr-isa ashi.

Kohima nung Dec 8 traffic tetuyuba agiener

Dimapur, December 7, 2021 (TYO): Hornbill Cross Country Championship 2021 melenshiba ajanga December 8, 2021 nü traffic tetuyuba ka agütsüba agiener, ta Kohima Deputy Commissioner, Gregory Thejawelie, NCS-i ashi. Taoba sangdong ka nung December 8 anepdang 7:30 ako

nungi nikongdang 1:00 ako tashi High Court Junction - NBCC Convention Hall - Sanuoru Bridge nung gari mesenzütsü metetdakja liasü saka ibaji agiener ta pai ashi. Kohima nung High School Junction nungi IG Stadium tashi lenmang nung akhi ama garitem senzütsü, ta Kohima DC-isa metetdaksü.

State Cabinet-i Hornbill Festival athir; AFSPA agientsü akhang



Mongulbarnü Kisama nung Commissioner & Secretary, Tourism, I. Kitto Zhimomi, IRS-i Hornbill Festival athiba osang metetdaksü dang agiba noksa angur.

Kohima, December 7, 2021 (TYO): Mon district nung India sepaitemi tai maketba nisung 14 tashi tepsetba sülen Nagaland sorkari Mongulbarnü Hornbill Festival athiba osang metetdaksüogo. Nagaland sorkarisa Centre dang AFSPA meypa agitsü takhangba agütsü. State Civil Secretariat nung rondak Cabinet senden ka amandang Minister Neiba Kronu aser Minister Temjen Imna Along nati iba osang ashi. Cabinet senden nung Oting-Tiru nung lendong atalokba lemsatep aser sorkari Special Investigation (SIT) ka tentetba den tasür kibong shia nem state aser centre sorkartemi teyari agütsüba osang metetdaksü. Cabinet-i SIT dang ita ka tsüngda bushisüngdangba maparen tembangtsü atema tetuyuba agütsü.

Mon nung civilian 14 tepset aser ana kanga mejungi yirur Dibrugarh nung anepaludar. Ano, nisung 6 Dimapur nung anepaludar aser nisung 22 mozü ki nungi anizükogo, ta Minister Kronu-i metetdaksü. Cabinet-isa India sorkar dang Nagaland nungi Armed Forces Special Powers Act (AFSPA) 1958 tangsa agienang ta shidi zülutsü telemetba agi. "Mon district nung asürtem mangyimsü atema Civil Society teloktemi akhangba ama Hornbill Festival nung benjungbentsü maparen ajak anener" ta paisa ashi. "Ajisüaka, chiyungtsü aser süngjanglijang amala stall tem lapoktsü melar. Anungji sorkar mapa inyaker tem aser tangartemi Hornbill Festival nung entrepreneur temi lapoka aliba stall temi oa alitsü mepishir" ta

Kronu-isa metetdaksü. State Cabinet-i tuyuba ama Tourism Department-i tanü Naga Heritage Village Kisama nung benjung tembangba sentong tatsüka agi ayonga agiogo. Mongulbar anüngdang Kisama nung Commissioner & Secretary for Tourism, I. Kitto Zhimomi, IRS-i Hornbill Festival athiba osang metetdaksü. "Nagaland State Cabinet-i Hornbill Festival mamongtsü lemtetogo" ta Kitto Zhimomi-i ashi. "Mon district nung tai maketba nisungtem khasetba ajanga Hornbill Festival athir. Ajisüaka iba tatalokba ajanga tourist tem tezü metangdaksünür aser tarutsü nunga Nagaland semdangi arutsü mepishir" ta paisa metetdaksü. Tanü nungi Kisama nung benjung amongba anener saka December 10, 2021 tashi food stalls aser stalls lapoktsü ta paisa ashi. **MISS NAGALAND TETOKTEPBAATHIR** Beauty and Aesthetic Society of Nagaland (BASN)-ia Mongulbarnü December 10, 2021 nü agitsü aliba Miss Nagaland tetoktepba athiba osang metetdaksüogo. Konyak nung den külemi mangyimer ta sayutsü atema Miss Nagaland tetoktepba athir, ta BASN-i ashi.

Mon nung tensa süngjemogo; Naga yimten latettsüla

Kohima, December 7, 2021 (TYO): Mon district nung tensa azüoka lir aser Naga nungeri teti atema yimjung bener arutsü atema Naga yimten tekaraba nung latettsüla ta Minister Neiba Kronu-i ashi. Mon district nung sepaitemi civilian 14 tepsetba sülen tensa kanga mejungi aküm saka tang tajungba kümogo aser Konyak Union-i Mongulbarnü district ajanga mokdang aser anogo tenetnü mangyimsü metetdaksü. "Asenok ajak longjemer Naga yimten latettsü atema mapa inyaksüla, kechiyong asenok yamai dang liyonga moutettsü. Asenok yimjung nung alitsü atema telemetba ka agitsüla" ta Minister Kronu-i metetdaksü. "India sorkari süoki ia bilemer anungji Naga nunger telemetba ka agitsü atema inyaksüla" ta paisa shisem. Nisung tepsetba ajanga Nagaland tensa koma lir ta osangbener asüngdangdang "Chief Minister Neiphiu Rio lenisüba kübok sorkar tashi itta lir" ta Minister Temjen Imna Along-i ashi. "Sorkari Naga yimten ken o angatetteptsü atema yimjung maparen tenzük. Iba lendong atalokba atema kanga sasar aser

Konyak nungeri takoksa ajuruba atema o mesüra teyari kecha agia malangzükettetsü" ta pai ashi. "Asenoki tatalokba ajak shisadangtsüla aser tekaraba nung Naga yimten latettsü atema inyaksüla. Sorkari yimjung maparen tiptema inyaka aotsü atema nübortemi tensa süngjema ayutsüla ta angatettsü imlar" ta Imna Along-isa metetdaksü. Mon district nungi Assam Rifles agientsü akhangba Cabinet-ia pusemer asü masü ta osangbener asüngdangdang "onoki iba atema shisadangtsü aser kokra India sorkar den angatetteptsü" ta Kronu-i langzü. Civil society tem aser talisa Naga Students' Federation (NSF)-i State Assembly indang special session ka jazüker Nagaland nungi AFSPA agientsü atema bangzüngteptsü mepishiba ama sorkari inyaksü bilema lir mali ta osangbenerisa asüngdangdang "Cabinet-i iba onük atema ano mejembi lir" ta paisa ashi. "AFSPA ya state sorkar masü saka Centre sorkar indang mapa lir aser Centre-i state sorkar den asüngdangtepa atsülanger" ta Minister Along-ia ashi. State sorkari tang tensa nung ajemdaker India sorkar dang Nagaland nungi AFSPA agientsü

takhangba agütsüogo ta paisa shisem. AFSPA ya Parliament indang ozüng ka lir anungji Constitution nung Arrla 371(A) nung aliba ama iba ozüng agientsü lenmang lir mali ta osangbeneri asüngdangdang "state sorkari agienang ta mepishitsü dang akok anungji Centre sorkari Nagaland nung sensotem taginüba angatettsüla" ta Along-i langzü. Nagaland State Assembly-i magizük tashi Parliament indang Act kecha Nagaland nung amshitsü makok ta Arrla 371(A) nung lateta lir. State cabinet-i AFSPA agienang ta mepishibaji mapa shitak inyakba lir, ta Minister Along-isa shisem. Mon nung nisung tepsetba sülen Core Committee on Naga Police Issue-ia kechi inyaksü bilema lir ta asüngdangdang "Core Committee-i December 9, 2021 nü Assam Chief Minister aser North East Democratic Alliance (NEDA) convenor Himanta Biswa Sarma den ajurutepa senden ka amentsü lir" ta Minister Kronu-i metetdaksü. Parliament nunga opposition aser ruling bench züngsemtemi Mon tatalokba atema süoki ia bilemer anungji tang yabo telemetba balaka agitsü imlar, ta paisa ashi.

Office of the **MONGSENYIMTI VILLAGE COUNCIL** (RIONGSANGER PUTU) B.P.O. Mongsenyimti, P.O. Chuchuyimlang- 798614 Mokokchung, Nagaland **TETUSHI YIMYIM** Yimtisanger takotet nangpong Wb. I. Meyionen Jamir Retd. IGP & Director Lokayuka Police Nagaland ajanga ochishia sorkar aser nübur tenzükba maongka nguteta Nagaland Sorkar nung Chief Information Commissioner Nagaland jenjang ajangzüktem nung lenir nem aküm tulu konang nüngsang Mongsenyimti Riongsanger Putu ajanga agütsür. Iba meraket tulu ozü senso tajung nem Wb. Neiphiu Rio, Chief Minister Nagaland ajanga nungloktü nung tongti Kilonser dang pelaba metetdaksür. Tsüngremi asen lenir taküm azükaru nung maneni aniangma ta moatsür. Sd/- Aosingit, Chairman Mongsenyimti Village Council Sd/- L. Lima Longkümer, Secretary Mongsenyimti Village Council

FLN baseline Assessment Survey 2021 atema orientation agi



Deputy Commissioner, Kohima indang Conference Hall nung December 7, 2021 nü Field Investigator pur atema NIPUN BHARAT mission kübok Foundational Literacy & Numeracy (FLN) baseline assessment survey 2021 nung orientation ka agiba mapang tangokba noksa nung angur.

Kohima, Luchii/Dec. 07 (TYO): Field Investigator pur atema NIPUN BHARAT mission kübok Foundational Literacy & Numeracy (FLN) baseline assessment survey 2021 nung orientation sentong ka December 7, 2021 nü Deputy Commissioner, Kohima indang Conference Hall nung agia liasü.

Theyievilie Suohumvii, Sr. SDEO Kohima ajanga iba sentong nükjidong indang rateta ashiba mapang, angazükba ya takum tepiyong atema lir aser angazükba yimyatem melenshia aoba nung tesayurtemi anidaksüla, ta ashi.

Kaketshir atema tamendak dak takang ka yangertsütsüla, ta pai ashi.

National Initiative for Proficiency in Reading with Understanding and Numeracy (NIPUN) Bharat Mission indang nükjidong nung rangloker jembiba mapang, 2026-2027 tashinung grade 3 tatemi

mesüra grade 4 tashinung tanurtemi azüngtsü aser zülutsü aser züngdangba angatetsü atema sentong balala tenzüksü aser mera agitsü atema iba sentong ya tenzük, ta pai ashi.

NIPUN Bharat Mission indang nükjidong tongtetsü atema tesayurtemi tangazüker nem kechi, kong, kodang, kechiba aser komaser ta asüba langzüksü angazükdaksütsüla.

Pai Field Investigator tem dang iba mapa ya ajungmesoba aser maongka ka ama agizüksü aser khuret ka ama mebilemsü ayongzük, kechiaser kaketshir ka indang Learning Outcomes (LO) nung kongshiba yimyatem sentong yanglurtemi jangjashitsü asoshi angazükba asadangtsü aser angazükba mapang timtem ajuruba tem bendentsü ya kanga tongtipang lir, ta ashi.

Iba sentong nung shisalen sayur Alemsong, Lecturer, DIET Chiechama ajanga FLN Mission and Objective nung

ajemdaker jembiba liasü. Iba mapang lai o jembitsü asoshi sayuba, decoding, tarendak makai azüngtsü akokba, comprehension azüngba aser züluba amala oshi-oben tamendak dak rangloker jembiba liasü.

Laisa pre-number concepts, numbers aser operations on numbers, shapes and spatial understanding, measurement aser data handling amala numeracy tamendak dak indanga jembiba liasü.

Kasa sentong nung ano shisalen sayur Kenilo Semp, Sr.Lecturer DIET Chiechama ajanga Introduction of Baseline Survey and Tool Administration aser Operational of the Study indang nung technical tsütsü nungi jembiba liasü. Kasa mapang FLN video indang concept sayua liasü aser Field Investigator nungi mangatetba tem asüngdanga sensaksema liasü.

(Maneni tapak 3 nung...)

Kapayong nungi Longpakyong tashi merüktet



Mokokchung, 07 Dec (TYO): Mokokchung Senso Mungdang ketdangpurtemi anir lenirtem Kapayong nungi Longpakyong tashi Dec 4, 2021 anogo tolang lenmang tezülen janaona merephsia aliba, ayong nung jana intoka alibatem merüka amung.

Osangzülur-i Mokokchung Senso Mungdang tir Temjenzulu Longkumer aser tongti zülur, Imnawapang Kichu den parnok mapa inyaka aoba aser nükjidong dak sentakba nung sensaksemdang, lenmang nung senzüsempongertemi alima merüka ayutsüsa ayong menentsüba yimya ya indoktsü ashi.

“Tang Kapayong nungi aluba lenmang ya asen Aor aser Naga nüburtem ajak meyong, sorkari teyari agüja lenirtemi achaayanga yanglua menoktetba lenmang. Iba lenmang nung nübur tzükong ajak kangasa sadema aser anisüngzuka senzüsemponger. Ajioda süaka, lenmang nung senzüsempongertem aser

sütöksünema kazürtemi lenmang tezülen plastic bottle, yi bottle, mica aser tanga menenmechi janaona intokba ajanga arem kangasa menentsür aser talisa ayong nung tzu tajemtsü majung kümdaksüba ya tebilemsü tulu ka kümadokogo”, ta MSM tiri ashi. Paise nüburtemi pei ki aser kima merüka ayuba ama tanüngba tesemtem nunga pei meyong ama anepalua merüka ayuba ajanga alima ajangzüksü, ta shisem.

Kapayong nungi tenzükba aluba lenmang ya Yimchalu adena Tzüsanger lenmang den sentaktepa lir. Iba lenmang nung lanur züngapur’züngatsürtem aonung nikongdang sütöksünema senzütepertemi yi aser tzu bottle plastic tapu balala jenti merephsia intokba Mokokchung Senso Mungdang lenirtemi merüktetba asadang nung Beer pongdang (Can) Kg 100 tema shi aser Rum bottle zünger mezüngma nangdena bendentet.

Parnoki item janatem bendena tzu mopung memenentsüsa

lemdanger rongtokba den bottle, merang aser plastic-tem gari nung Mokokchung tonga bener adoka tim intoktsü tesemtem nung intok.

Lenmang nung senzüsempongertem, benjong mapang kazüa sütöksünemertem ajaki iba lenmang tezülen menenmechi masütsü wainshin aser tangatetba alitsü nüngdaker, ta MSM ketdangpurtemisa metetdaksü.

Mokokchung Senso Mungdang-i nübur ajaki züngzünga reprangtetsüsa merang sabang yanglur yangji temetetsü nungji “...Temesepba Chiajema senzüksü memelar...” ta zülüja lir. Ajioda süaka, nüburtemi mangateti iba lenmang nung kazütepa temesepba pongdang tazüng merephsia intokba, plastic aser ki janaona posta nung sepdener arua ayong nung mereptokba aser süoshi tajung semer, gari tajung nung mener arua senzüsempongba ana yabo khenyongi meputeper aser tangatetbaji khenyongi tamashi ta sayur.

Tanü alima libajen (environment) merüka, süngdonglidong, arem aser shirurtem wazüka ayutsü indang alima tzu mopung menenba tebilemsü indang kangasa sashia jembir aser aikati itemji merüka ayutsü atema mera agiteper ajioda süaka, tangatetba aser mapa meputepi inyaksangshiba ajanga asenok takoksa tulu mapang memenui ajangshitsüsa akümtsü.

AKM-i Mokokchung nung silent procession ayongzük

Mokokchung, 07 Dec (TYO): Mon district kübok Oting yimdak Dec 4, 2021 nü India sepoy-temi tai maketer nisung aika tepsetba asoshi tejashiba sayuba den AFSPA anema Ao Kaketshir Mungdang (AKM)-i Dec 6, 2021 nü ola madok lungkak aitba (silent procession) sentong ka takok ngua ayongzükba kaogo.

Iba silent procession-ji Mokokchung Imkongmeren Sports Complex nungi tenzükba yimdong süa arur Mokokchung Police Point nung sentong ka agi, aji sür külen Nagaland Governor dangi züluba takangba chitti (memorandum) ka Mokokchung Deputy Commissioner office nung agütsü.

Dec 4 nü Indian sepoy-temi tai maket nisung 15 tepsetba atema kukua aitsür, Sepoy-temi iba ama shiruru ama inyaksangshiba ya civil code aser meimchir temeten anema lir, anungji, Armed Forces Special Power Act (1958)-ji tangsa tang agiintsüla, kechiyong iba ya ajanga sepoy-temi kiralongra mapa inyaka yimjung raksatsür aser state nung mekateptsü

(ceasefire) aser yimjung kishi lapoka jembishinüba mapang ka lir, ta AKM-i züluba chitti nungji shia lir.

Tejak mereprangi bushisüngdangba independent judicial inquiry ka shimtsüla aser aibeleneritemji tekaratiba nung temzüng kübok anir arutsüla, ta chitti nungji shia lir. Nüburtem yimjung nung alitsü asoshi nübur aliba tesem nungi security force camp ajak agiintsüla, ta AKM züluba chitti nungji shisema lir.

Tanü police point nung sentong akadangji Ao Kaketshir Mungdang (AKM) tir - Nungdokyangar Ao, Eastern Nagaland Students’ Union Mokokchung tir - Imtitochi Chang, taoba AKM tir - Aodangnok aser AKM tongti zülur - Nekmi Longkumer parnoki mapang tatsütsü agia jembiba.

Tanü iba sentong nung AKM kübok unit balala den Eastern Nagaland Peoples’ Union Mokokchung-i anir tetsür telungjem (ENWOM), kaketshir telungjem (ENSUM), Watsü Mungdang aser temulunger nisung aika adenshia shilem agi.

Kohima Police-i ganja seret 350 den nisung ana apu



mita bushidang ganja seret 350 tashi polythene packet 35 nung seret ter-re kanga junga alepsar nguteta liasü, ta sangdong ka ajanga ashi.

Iba dak sendakba nung nisung ana - arishi küm 20 tain Solomon aser arishi küm 19 tain Kadakho - pua liasü. Mezüng bushisüngdangba mapang gari den iba temesepba oset ya Senapati nungi Dimapur tsütsü aorba liasü, ta temai adok.

Pua aliba oset ya sen lakh 17.5 shi jenjang asütsü. Iba maparen maneni bushisüngdangtsü atema ken o ka South Police Station nung zülüoka lir, ta osang ajanga ashi.

Kohima, Luchii/Dec. 07 (TYO): Kohima Police nungi telok kati teti ama mita aoba mapang December 7, 2021 nikongdang 4:30 ako meta Agri Colony, Kohima nung Mahindra Scorpio (NL01H-0596) soiter

75 Lakh Post-Card Campaign nung LFI puri shilem agi



Dimapur, Luchii/Dec. 07 (TYO): Linük tesem ajungalen '75 Lakh Postcard Campaign' nungja agütsür Ministry of Communication, Department of Post ajanga Department of SE & L, Ministry of Education den lungjemer ayongzükba sentong nung Livingstone Foundation International nungi kaketshirtemi shilem agia liasü.

December 1 nungi 20, 2021 tashi agitsü aliba sentong noklem mezüngbuba nung Livingstone Foundation International nungi Grade-IV nungi XII kaketshirtemi shilem

agia liasü. Iba campaign nung shilem ka ama school ajanga postal department nungi postcard 100 meshi aser kaketshirtemi 'Unsung Heroes of Freedom Struggle' aser 'My Vision for India in 2047' onük nung zülüa liasü.

Item postcard ya India Ato Kilonser dangi züluba alitsü. Kaketshirtemi züluba postcard tem ya asadanger CBSE totuyuba ama tajungtiba ter shimtet aser scan sür iba campaign atema agüja aliba CBSE portal nung upload süja liasü.

Parliament nung Pradyut Bordoloi aser Agatha Sangma nati AFSPA agientsü akhanger



Agatha Sangma



Pradyut Bordoloi

Guwahati, December 7, 2021 (Agencies): December 4 nü Nagaland kübok Mon district nung 21 Para special forces-i Oting nuger 13 tepsetba sülen Armed Forces Special Powers Act (AFSPA) agientsü atema ola tuluba adok tenzükogo.

Mongulbarnü Assam Congress Lok Sabha MP Pradyut Bordoloi-i Parliament nung Mon district nung sepaitemi tai maketba nisung 13 tepsetba indang benoka jembidang sepaitemi aiben tashiyim ozüing AFSPA tim mesüi amshioigo ta ashi.

"Iba Act (AFSPA) tim mesüi amshiba ajanga lendong aika atalokogo. Iba jagi aibelenertem ozüing tapet agi merenshitsu" ta Parliament

ning Bordoloi-i ashi. "Kasa mapang nung iba Act yanglushitsu nüngdaker. Nagaland sorkari bushisüngdang asütsü ta asüba ajanga iba ken o metembangtsüla" ta paisa ashi.

"Nagaland nung nisung tepsetba atema bushisüngdang asüba ya tejak meiba mapa ka dang masütsüla saka tatishitsu süa nisung tepsetertem merenshitsu" ta Lok Sabha MP Pradyut Bordoloi-i ashi.

"Sepaitemi asen senso dak iba ama tashiyim mapa inyangdang India nung ka ama ni kanga aaker" ta paisa metetdaksü.

"Lanurtemji anogoshi aayangertem liasü. Parnok Honibar nikongdang pei pei kibong den amongtsü aser

Deobarnü sentep nung adentsü atema kidangi meyipa arurba liasü. Saka parnok tepset" ta Bordoloi-isa metetdaksü.

National People's Party (NPP) MP Agatha Sangma-i Lok Sabha nung Armed Forces Special Powers Act (AFSPA) meyipa agitsü atema takhangba agütsüogo.

Taoba mapang NPP national president and Meghalaya chief minister-ia kasa takhangba agütsüogo.

"AFSPA agientsüla" ta Meghalaya CM aser NPP national president Conrad Sangma-i metetdaksü.

Northeast nung political party tem aser teloktem aser ano chief minister anai iba tashiyim Act agientsü atema takhangba agütsüogo.

Assam CM-i ex-NDFB züngsem 1,669 nem senotsü teyari agütsü



Assam Chief Minister Sarma-i Deobarnü Tamulpur nunga ex-NDFB züngsem nem senotsü teyari agütsüdang tangokba noksa nung angur.

Kokrajhar, December 7, 2021 (Agencies): National Democratic Front of Bodoland (NDFB) nung züngsem 1,669 nem senotsü teyari agütsüogo.

BTR chief executive member Pramod Boro lia Assam chief minister Himanta Biswa Sarma-i parnok nem cheques agütsü.

NDFB züngsem 1669 ji Kokrajhar nungi 1122, Chirang district nungi 513 aser Goalpara nungi 24 liasü.

"Tang tashi nung NDFB züngsem 4203 nem teyari agütsüogo" ta taoba NDFB tanishir aser BTC executive member B R Ferengra (Ranjit

Basumatary)-i ashi. Ano nisung 1952 nem teyari agütsütsü aser parnokji Saoraigwra group nungi 1561, Govinda Basumatary group nungi 163, Ranjan Daimary faction nungi 184 aser Dhiren Boro group nungi 20 lir, ta pai metetdaksü.

Assam kübok police station balala nung taoba NDFB züngsemtem anema ken o 1586 tashi benoka lir aser ken o 200 tema bentetogo, ta B R Ferengra-isa ashi.

Sorkari Bodo Accord o aser mapa agi inyaksüla ta chief minister Sarma-i ashi.

Telungpur nem teyari

agütsütsü aser taoba NDFB züngsemtem anema ken o benoka alibatem meyipa agitsü mapatem inyaka arudar, ta paisa metetdaksü.

Bodo peace accord nung sign asüba sülen January 30, 2020 nü National Democratic Front of Bodoland (NDFB) züngsem 1615 tashi temai adokogo.

Bodo Peace Accord, 2020 nung lateta aliba ama taoba NDFB züngsemtem nem teyari agütsüba mapa tenzükogo.

Chief Minister Sarma-isa Deobarnü Tamulpur nunga ex-NDFB züngsem 1,105 nem senotsü teyari agütsü liasü.

Arunachal NPP-i Nagaland nung nisung tepsetba aitsür Itanagar, December 7, 2021 (Agencies): Arunachal National People's Party (NPP)-ia Armed Forces (Special Powers) Act (AFSPA) agientsü atema takhangba agütsü.

"Nagaland kübok Mon district nung Oting anasa civilian 13 tepsetba ya kanga dang temolung raksaba tatalokba ka lir" state party

president Mutchu Mithi-i ashi. Arunachal state NPP-i tasür kibongtem den mangyim lemsateper aser nisung tepsetertem merenshitsu akhanger, ta paisa ashi.

"North East nung sensotem dak AFSPA tashi amshia armed forces-i mebilemdangi inyakba iba tatalokba ajanga sayur. AFSPA ya agientsüla" ta Mithi-isa ashi.

DNLA telungpurtemi yimdaklir 2 zükset

Dima Hasao, December 7, 2021 (Agencies): Mongulbarnü Dimasa National Liberation Army (DNLA) telungpurtemi North Cachar Hills kübok Langting nung kar merenshi.

DNLA telungpurtemi yimdaklir kar Maibang nung parnok tesep kati anir ao aser idangji nisung ana zükset.

Tenaji Ramsen Langthasa aser Kuton Goswami na ta

jangjaogo.

Iba tatalokba nungsa nisung 9- Abhinav Thaoson (22), Ramesh Hagjer (38,) Mondesh Langthasa (40), Raju Ardao (17), Nairingdao Bathari (19) aser Jamuna Singh Hasnu (26) nung yirua lir.

Teyirurtemji Haflong Civil Hospital nung anioka lir aser police-i iba dak sendakba nung DNLA telungpur 5 puogo.

Manipur nung Rs 508 crore alang mozü apu



Guwahati, December 7, 2021 (Agencies): Assam Rifles aser Manipur Police-i Northeast nung ozüingi memelaba mozü teimtiba puogo.

Parnoki 'methamphetamine' süngjang seret 154 aser heroin seret 54 den teimba apu. Iba indang jenjang ya Rs 508 crore shi ta asadangtetogo aser Myanmar nung ka pua lir.

"Hombor nikongdang Moreh nung aliba Sunrise Ground anasa Assam Rifles aser police külemi ki ka mita aodang heroin powder seret 54.141 aser methamphetamine tablets seret 154.314 tashi apu" ta Tengenoupal SP Vikramjit Singh-i ashi.

"Heroin powder indang jenjangji international market nung Rs 108 crore shi ka aser methamphetamine (Crystal

Meth) süngjangji Rs 400 crore shi ta asadangtetogo" ta pai metetdaksü.

Assam Rifles aser police-i arishi küm 19 tain Monkhai apu. Pa ya Myanmar kübok Khampat nung alir.

Tengenoupal SP Vikramjit Singh den Moreh Battalion nung 43 Assam Rifles Commandant, Colonel Sumit Sood na dener mozüji apu.

Parnoki apuba mozü aser nisungji Moreh police station ket nung agütsüogo aser Narcotics Drugs and Psychotropic Substances Act kübok ken o ka benokogo.

Methamphetamine dang 'Yaba' mesüra 'party tablets' ajar. Iba synthetic drug ya India aser Bangladesh o meketa aliba linüktem nung lanurtemi kanga amshir.

FLNbaseline Assessment... (TAPAK 2 NUNGI...)

Field Investigator nem inyakshitsu aser tali tejangjaba nung metetsü asoshi dummy booklet agütsü liasü.

Iba sentong tenzükba session nung Thongsleno, Assistant District Coordinator DMA Samagra Shiksha Kohima menden liasü.

Deputy Commissioner ya Chairman ama District Steering Committee asr department balala nungi District Officer ter tenteta lir aser parnoki NIPUN BHARAT Mission reprangtsü aser DEO tekolak sür District Management Unit(DPMU) aser SDEO tekolak sür Block Project Management Unit(BPMU) tenteta lir aser parnoki iba project 2026-2027 ya metembang tashi district aser block level nung iba dak sendakba maparen inyaksü, ta mendenpubai ashi.

Francis, TOT EBRC

Tseminyu ajanga iba orientation session record asü aser Kajina Sote, Project Assistant DMA Samagra Shiksha Kohima ajanga melepzüing o jembia liasü.

Field Investigator temi December 9 nungi 10 tashi NIPUN BHARAT Mission kübok nija aser sorkar meyong school 25 nung baseline assessment survey 2021 agitsü.

Directorate of School Education, Nagaland ajanga tuyuba den lirumedema Kohima district kübok Head Teachers/ Teachers In-Charges/ Principals/ Headmasters tem dang iba survey takok angua agitettsü atema Field Investigator tem den amalitep akatsü metetdaksüogo.

Iba survey nung District Mission Samagra Shiksha Kohima aser Educational Block Resource Persons (EBRCs) nungi ketdangsurtem observer alitsü.



TIR YIMYIM

YIMOBILEM (EDITORIAL)

DIMAPUR RASEMNÜ, LUCHII(DECEMBER) 08, 2021

Sepaitem teyari magitsüla

India yimten nüchiso asoshi mapang talangka raraa aru, idangji taküma aika lalu, saka kodang Mahatma Gandhi lenisüba nung British nungger jilu ajizüka agiba süoshitem magitsü telemtetba agi, pa dena temesung nisung jilu ajizüka asemba tula, longpant aser tsungsem ajak semzüka toktsür India nungger süoshi dhoti aser jabel dang asemtsü tenzük. Iba mapang India nungger temi pi temesung nisung süoshi agia alibatem bendena rongdokba jenangji 1921 küm sen lakh ka ser tesadang ka shi jenjang liasü. Iba sülenang India nungger yimten nüchiso asoshi jembir ajaki Gandhi ama India nungger süoshi agi tenzük. Ibaji India yimten nüchiso asoshi tashiyim mamshii "Non violent" yimya nung yimten nüchiso asoshi raraba yimya tapu ka liasü. Iba sülen British teyari agia nübortem yaritsü bajibo otsü maka saka British yimten den kenyongi amalitem malitsü Gandhii nübortem nem angatetdaksü. Iba jagiang, British nungger mulungjang nung jembir tenzük aser kopi melii India yimten nüchiso angu. Ibaji mesüka tanü asenoka yimten nüchiso asoshi India den küm noklang junga raraa arur, saka asenokbo India teyari medeniang asen yimten temeten indang mejembitettsüsaba tensa tia ka nung lir. Iba jagi, tang tesüsa India government den Naga yimten nüchiso bushirtem, Naga yimten tebilemstü ken o ya tembanga telemtetba ka agitsü nükjidong nung, parnok tsungda yimjung lapoker küm 25 tashi nunga yimten ken o telemtetba kati marutetter. Ibajibo yutsür, tangbo külen Naga yimten nüchiso bushirtem 'designated camps' nung ayur aser külen alu lenmang nung dena tai maketba Naga nungger yimtaklirtem shirurua memeyong kaseter ta India sepaitemi akhi ama, Naga nungger tsübuokdaksütsü sentong tenzükogo. Atangji, India sepaitemi taoba küm 70 tsungda Naga nungger anema inyakba apibo, parnok den kodanga yimjung nung melinütsüka, saka alima nung shibaibo yimjung nung melinür, anungji yimjung nung linüba agi aser tarutsü lanu putubo tetsübu melii tesünep nung lidaksünüba agi, parnoki reshikangshiba aser maksü benshiba mapa tamajung ajak amadoker, yimjung nung mapang tatsüka lia aruogo. Idangji, India sepaitemia Naga nungger temi den tesendaktep tajung nung linür amai nübortem nungdak reprangteta mapa tajung tapu balala inyaktsüba ajangshio. Aji oda, kar nem asayadak moapu tutsür, kar yimtakbo yimten asoshi ki tena yanglutsür, aluyimtsü aser chiyongtsü tapu balala yanglutsü sayur, mapang mapang shia medical doctor-tem dena anir yimtak yimtsung tonga oagi angati mozü agüja shirangertem anepalur. Lendong timtem atalokba mapanga aiben parnok tama ser yariteper. Yamaji, parnokji asenok asoshi teyarir tajung amai lir. Ajisüaka, itemji temeim mapatem masü saka asenok mesüzüksü merangba mapatem lir ta tang jangjaogo. Atangji, asenokbo teyari masü temeim nungdaker. Iba temeimji India sepaitem dak ali asübo asenok yim aser alu merongdoktsüla, asen tsüraburtem mekangshila aser parnok dak mapa tamajung meinyakla. India sepaitemi asenok meim asübo aser asenok lendong timtem nungi kümzüka anüksü yokba mitkartem asü asübo, parnoki Oting nung yimtaklirtem pei mapa nungi pei yim bushia oa alidang mekhasetla. Joko, asenoka kopiga yamai mezüngmeshidaksütsü ? Tanü Oting nung atalokba mapa nung ya asenok tan ser, joko Gandhii anir British nungger süoshi aser oset kecha mesübu aser mamshi ama, asenoka India sepaitem nungi teyari kecha magitsüla. Asenokibo parnokji tembar teyariteper tajung amai bilem saka parnoki asenok ya parnok tsükchir danga taoba mezüngmeshir. India sepaitemi, akhi nungi tsükchitepa aruba kin China aser Pakistan nungger temi daka tang Oting nung inyakba mapa amabo meinyakdangka asütsü. Tai maketba nisungtem kaseta yutsür, itemji telongpur kümstsütsü atema tasü mang dak nungi süoshi agizüker sepa süoshi melentsütsü merangba mapa jagi India sepaitem shisatsü jangjangjaa sayuogo. Parnoki aji inyaktet asübo, parnoki Oting anasa kasetba Naga nungger ajakji telongpur kümstsüla aser India sepaitemjibo arkotongbai anir Independence Day nung 'Award' ngula. Iba tashiji parnoki inyakaka, asenoki parnok anema injang prangpong agi raratsü menügdaker, saka Gandhi-i raraba tongpang yimya mesüka asenoka azü medokshii aser tashiyim mamshii asenoka asen temeten asoshi raratsü kanga nungdaka kümogo. India-i Oting nung inyakba atema taidok memeshi tashi aser Naga lima nungi Naga nungger tai maketba purtem dak temulung malem bilemba kija agi kaseta endoktsü latetba Armed Forces Special Power Act, 1958 ozung magien tashi, Naga nungger shingai aser koba yimeria India sepaitem nem asayadak ground, lenmang aser kimong metudaksütsüla, kiojen meyangludaksütsüla, computer aser tanga teyari osettem agütsüyonga memeshitsüla, koda masüyonga parnok zübo magitsüla aser lendong nunga parnok nem meyaridaksütsüla. Iba jagi asenoki asen temeten asoshi nokdakba tongpang meraketa akoktsü.

OLEMSABANG

CHRISTMAS

Talubosa taküm akatsü asoshi ni aruogo (Yohan 10.10)

~ Dr. O. Shiluina Jamir

Sabangpur ajak dangi anepdang tajung aser advent Christmas salem abener. Tanüp asenok den Yohan 10.10 "Parnoki taküm angutsü aser aji talubosa akatsü asoshi ni aruogo" ta ashiba nungi ajemdaker shisatsü kar lemsar. Iba Lai tekong ya Christmas mapang ajaki saboa azünger. Kechiaser iba Lai nungi Christmas nükjidong ratettsür aser tanüa tangazüksü shisatsü tarok aika lir. Kechiba Yisu Khrista alimai aru iba nükjidongji talisa tenyari sannükertem dang Yisu asoba osang sangoktsüba tsütsü nungji reprangera, "Aser tenyar jaki parnok tang ashi, Metsübu liang, kechiaser ajiang, ni nenok dangi nisung ajak asoshi tepela tulu osangtajung bener arur" (Luk 2.10). Yisu asobaji atangji taküm, talubosa taküm akatsü asoshi aru ta asübaji jangja janga sayur.

Hao, Yisu Krista alimai arubaji atangji osangtajung tulutiba lir. Kechiaser Yisu Khrista ali meimchir rongnung jungkai adokba ajanga temenenpur Khrista zü, temeim aser taochi nung tekümtet agütsü (Matt.9.13), nükpoker ngudaksü (Yohan 9.13ff), aser meimchir libaliru kimong tasen bener arutsü. Yisui ashi "Anungji nisungtemi nenok nem kechisa inyadaksünur yamaji nenokia parnok dang inyakang" (Matt. 7.13), Pai taneptsü agütsür (Luk 8.43ff, Matt. 12.22-28), pai sensaker dang osangtajung sayutsüngitsü, puoka alirtem dang techiokba sangoktsür, nüpkokertem tenük lapoktsür, tajemrepba nisung nüchi kuma yoker (Luke 4.18). Iba taneptsüba, tenük agi anguba, aser pouka aliba tia nungi salatsüba ya tanela, shi nung, emotional, lokti, yimdenren nung, asenok shisatsü aser taküm libaliru taneptsüba indang ashir. Yisu aruba ya osangtajung kechiaser pa ajanga asenok teti taküm angur (John 3.16), aser taküm agütsür, aser aji jenti angutsü (John 10.10). Aoüri tauyatsü, tepsettsü, aser samadaksütsü asoshi arur saka asen Kibuba Khristaji taküm jenti alangzüksü asoshi aru. Roman yimli mapang 70 percent nüburtem chiyungtsü mali, sensaka, tax saru agi alenpanger aliba mapang ka nung, Yisui-i taküm jenti angütsür (abundant life) ta asübaji parnok asoshi kanga dang anisungzük and teimla o liasü.

Asenok Aor/Naga nungger lokti nunga Yisu alima nung aliba mapang amaji nisung teimba ka sensak, makamait tia nung lir. Asen Ao lima nung yimtak mesüra yim anasa hospital malibayong, hachirawala sen akaba mesüra apudena Maruti van hire sür, lenmang majungba agi gonda ka lenmang, anogo piyong lenmang nung mapang entoker külen Dimapur, Mokochung mesüli Jorhat tonga taneptsü bushia aor. Saka kasa Aor karbo Helicopter hire sür Delhi, Guwahati, Vellore, Singapore, New York-i treatment agi aotsü rongsen lir. Asenok arogopurtem rongnunga hajarawala küm piyong tzunglu aser anogoshi anüi apu pei chirnur fee agütsütsü asoshi meranga inyakdang karbo süpokrem anguba ajanga aser tax saruba ajanga pei chir city balala nung jangratema talubosa jabujaria lidaksür. Ano kibong karbo maka maitba ajanga pei akaba ali yoker mesüra mortgage sür taneptsü bushi mozüki bushia aoba, mesüra pei chir higher education bushitsü asoshi yoker. Iba ama mapang ka nung, Yisui taküm talubosa/jenti agütsür ta asüba ya tanaben meyipa reprangdangtsü kanga tongtibang.

Asenoki taküm tabulosa anguba (life abundant) ta asüba ya pei asoshi RCC ki tulu meraketa asüba, mesüra pei ochi shia meranga inyakba rongsen agi masü, saka tangar/lokti indang development sen mesüra yimtaklir teyaritsü sorkari agütsüba sen, student scholarship, lenmang yanglutsüba sen, school ki yanglushitsüba sen, BPL rice sensaker nem alemtsü sorkari yokba miima yoker pei ki yangertetba, development sen aouyar yimtak Christmas benjong agütsüba, arogo nem lakhsa lakh tenla agütsüba talubo taküm ta bilemer. Aikati bilemstü akok, item tenla aser Christmas benjong agütsüba ajanga Yisu pelatsü. Oh koda tamashi! Ochimashi aser aoyaba sen agi Tsüngrem sentsüwangshidaksütsü makok. Asenoki Yisu Khrista masü sen külemer kümogo. Asen Aor Khristantemi koda sür iba amala shisatsü ya angu aser amshir. Iba shisatsü aser mapa yabo Laishiba nung amshitsü shia mali. Tanü colonial tangatetba mulungsentsü agi tamangba yimsü ya amokbanga lir. Kodang Colonial Christianity ta ashir yangi temerenshi aser temoatsü (reward and punishment) indang tsütsü atsünga Lai angatetba dang ajar. Tsüngremer temoatsüji rongsen ta angateter aser taküm nung Tsüngremer temerenshiji, tat. agi shirangshiko, tasüba aser makamaitba ya ta sayur. Küm ishika tejaklen nungi iba shisatsü aser tangatetba ya asen lima kanga sashia sayuba angutsü, iba dang ya prosperity gospel ta ajar. Prosperity gospel nungya ajemtaker asenoki aiben Lai o rongsen bendentsü asoshi tesayuba tai agütsür. Tat. agi, 2 Korint 9.7 "Nisung shia kechi koda pei temulung nung mulungtet, aji oda agüjang, saka nungnanga masü, kangshia masü, kechiyong Tsüngremi pelashisia agütsür meimer." Iba Lai tekong ya sen sarutsü mesüra tenla ki asütsü asoshi tenla sarutsü asoshi kanga dang bulua amshir. Saka kasa Lai tekong ya asen arogopurtem rongnung timtema alirtem nem agütsütsü, mesüra taochi mapa inyaktsü asoshi mamshir. Joko asenok sarasademba ya Tsüngrem tang rongsen meshiba sarasadem dang kümogo. Asenoki sarasademdang Tsüngremer taochi (grace) aser Tsüngrem asen mulungjang ajak agi meimtsü, mesüra asen kiyonger asen ama bilemstü shisatsü aser temulungjang memeshir. Asenok sarasadem nung Tsüngrem dang tajung Samaritan amato dangar timtem nung aliba ajitettsü shisatsü aser teyaritsü temulungtetba memeshir. Asenoki sarasademdang Tsüngrem dang ochi aser tiyazü bendangtsü, temeim nung ochi (justice) inyaktsü memeshir. Anogoben asenoki rongsen aser taküm tajung dang meshir. Saka taküm talubosa angutsü asoshi Tsüngremer taochi koba ajanga asen mulungjang nung tajung inyaktsü aser Khristar lemang nung jajatsü tashi agütsür iba taochi tanelajia meshitsüla. Asenoki taküm jenti angutsü ta asübaji alima rongsen len dang bilembayong taküm talubo agütsü (life abundant) ta sayuba ya shirang yipten nung alir asoshi, mesüra sentsüh agi alener alirtem, mesüra yi aser drugs agi alener tesünep makai aliba kibongtem rongnung, mesüra taküm küm corona wara ajanga tasüba ajangshir kibong nung, anogo shi kinungbo-i kinungtsü tashiyim agi merenshiba kibong, mesüra Mon district nung Oting yimtak yashi (4th December 2021) Indian sepaitemi kasüter kibongtem nungto Yisui taküm talubo/jenti mulamoshia agütsür ta asüba temaitsüji kechi ta masüngdang kechiaser asenoki pei asoshi dang mesüra sen dak dang renloktsü bilemer.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Alabama nung aliba Arogonung missionary kadak injang khaloktsü



Latter Day-Saint nungi missionary arrshi küm 18, Michael Fauber (tiyong) aser pa tetsü o tebu nung kulemi tangokba noksa nung angur.

December 06, 2021: Taoba Hokolbarnü (December 03) hopta tatemanglen Arogo indang Alabama mejangjaba nisung kati Latter-day Saints indang Church of Jesus Christ nungi missionary ka dak injang aiben khaloktsü;

Latter-day Saints otongdar, Sam Penrod-i, arrshi küm 18 missionary, Michael Fauber ya Dayton, Ohio nung alir, ta metetdaksü.

Arogo inyakyim indang taliba angazüktsü atema arur telok ka den Fauber densema missionary asem Birmingham Stake Center (Vestavia Hills) nung lia iba lendong atalok.

Penrod-i ashiba agi, iba centre indang cultural hall nung nisung kar basketball asayaa liasü, iba mapang nungji hall telungi aiter ka basketball khen asayaba sülen Fauber den jemi aser pa dak injang aiben khaloktsüba sülen jena ao.

Deputy Chief, David Agee-i, injang khaloktsüsangji arrshi küm 25 shi, tanak nisung ka, tekongra aser feet 6 ser inch 7 shi lir, ta metetdaksü. Tang tashi nisungbaji mapu.

Iba tatalokba sülen Fauber ji ilonga Birmingham nung aliba UAB Hospital-i anir oa surgery agi aser par tsüraburtema Ohio nungi aru.

Pa injang agi kanga mejungi yirua lir saka tang tajungba kümdar; maneni pa atema sarasademdaksüner, ta Arogoi metetdaksü.

Haiti nung puer aoba Khristan missionary asem chiokogo

Luchii/December 07, 2021: Taküm October ita tomlen Haiti nung prangpong amer telok kati Christian Aid Ministries nung inyaker missionary 17 puer aoba sülen hopta ana tejaklen missionary anabo chioka liasü aser December 5 aonunga missionary asem chiokogo, ta Christian Aid Ministries-i sangdong ka ajanga metetdaksü.

Christian Aid Ministries-isa tanungba missionary 12 chiochtsü atema maneni sarasademdaksüner, ta mepishia metetdaksü.

Haiti nung 400 Mawozo teloki Canada nung missionary ka den America nung missionary 16 puer ao saka parnok rongnungi tang tashi nung pongubo chiokogo.

Hombarnep Christian Aid Ministries-i sangdong ka ajanga, "Pua alirtem asem yasung chiokba atema onok pelar. Chioka alirtem junga dang lir. Tamalen missionary ana chiokba tenung memetdaksüba ama tang chioka alirtem tenung-a memetdaksütsü, mesüra iba dak sendakba osang melemsateptsü," ta metetdaksü.

Parnokisa tanungba missionary 23 chiochtsü atema taruba anogo asemnü tashi sarasademdaksüner, ta mepishia metetdaksü.

"Yimlibilema tang tashi pua alirtem asoshia sarasademdaksüner. Onoki pua alirtem tanaben parnok



October 16, 2021 nü Haiti nung Christian Aid Ministries nungi missionary temi semdangba lajartem anepaluba ki- 'Maison La Providence de Dieu orphanage' noksa nung angur.

kibongtem den anepaluba ki ka semdangba longjemdaksüner. Nenoki sülen meyipa aoba mapang maneni nungita sarasademtsüba prangpong amer telok jagi atema pelar," ta metetdaksü. parnok ajak puer ao.

Hopta ana tejaklen-a Parnok ajak kümzüktsü missionary ana chioka liasü; atema Mission field director aser osang angazükba agi missionary American embassy nati kanga tain anaji shirangba agi longjemer maneni inyakdar. chiok ta bilemer.

400 Mawozo telok lenir, UN Security Council-i vote Wilson Joseph-i missionary tem agütsütepa Haiti linük nung chiochtsü atema parnok nisung anogo ka dang lirbo America shia atema dollar sen million nung missionary temji puer ao. kaka agütsütsüla ta takhangba agütsüogo, saka tamalen missionary ana chiokbaji sen agütsüba agi chiokba masü.

Taoba ita osangbenertem den jembidang U.S. National Security Advisor, Jake Sullivan-i, anogo shia Tir, Joe Biden nem osang metetdakja arudar, aser Tiri talisa pua alirtem rongnung tanur pongu atema tebilemstü katsür, ta metetdakja liasü.

October 16, 2021 nü Christian Aid Ministry nungi missionary temi lajartem

ANO GO ABEN TSÜNGREM DEN

Nai komala tola asemer ?

"Anungji Tsüngrem meyong shimtetba ama aser temeimba, aria bilemba temulung yimlibilem, tila akümba, ajemaluba, talangka aremzükba item sübuang."

Ocet tila ka nung züngshibaji Liverpool clubpur jersey kechiba tang ya kanga sabua asemer ta asü nung parnok goal keeper, Alisson Beckeri asema agi ta langzüba ka zülua angu. Tolaji masü saka shibai asemer iba jagi tola jenjangji kadaktsür. Iba ocet züngshidang laishiba nunga sübutsü indang shia aliba bilemteter. Paul-i Kolosi nung dang temeimba, aria bilemba temulung yimlibilem, tila akümba, ajemaluba, talangka aremzükba item sübuang ta shia lir.

Tamanger ka tanela tolaji item ayakji lir; kechiaser Yisua ibaji sübu aser jenti pa sülen anidak. Mamanger puatsübaji asen dak itemji sübua lira tangari aseni asema jaklaji nükshia akümtsü. Kibubai asenok nem tenyaba mapa nungloktsübaji asen taküm libaliro, yimyakoya, aser asen jembishinü agi Yisu tobur ajungji sayutsü nungloktsü. Asenok Yisu nütüngtem aliba yimya agi yangpanga sübuba agi samaba tanela anir marutetsü, saka ajemaluba, tila akümba, aremzükba itemji sübuba agi Yisu tali meteta kümdaktsütsü. Na-a kechi koma tola süma lir?

SARASADEM

Temeim Yisu, ne yimya agi ni sübua alitsü teti ni yariangma, kechiyong karibosa ni repringdar. Anungji Ne tobur ajung angutsü, ni ajemaluba sübutsü sübudi. Amen

Reshikangshi nung alirtem nem Laishiba 100,000 agütsütsü

December 07, 2021: America "Tanga mapang dang nungi nung kanga tongtibang Christian tang tenügdakba, aser ministry kati reshikangshia tia America nungeri iba nung alir Khristantem nem tayongzükba koktettsü atema Laishiba 100,000 agütsütsü. inyakba ngua onok kanga

US nung amenoka aliba ajungmesor. Iba ya ajanga alima telok- Open Doors USA-i alima tesem balala nung reshikangshia tia nung aliba Khristantem reshikangshiba mita repringer taküm nung temelenshi bener aser osang benedener. arutsütsü imlar," ta paisa

Osangbener den jembidang metetdaksü. Open Doors-i, Afghanistan, Lasihiba alizüka agütsütsü North Korea aser Nigeria atema Open Doors-i November densema linük balala nung 23 nü email ajanga fund raising reshikangshia tia nung aliba tenzüka liasü aser November 30 Khristantem nem Laishiba nü tembang.

Open Doors telok ya 1955 100,000 agütsütsü atema küm Brother Andrew-i tenteta November ita tatemlen tashi liasü. Iba kümji pai Volkswagen Beetle gari nung Laishiba aika miima bener Laishiba nung alir nokdangba linüktemi oa Khristantem teket nung Laishiba lema agütsü.

Open Doors Tir, David "Tanü tashi Khristantem reshikangshiba linüktemi Curry-i, US nung kanga Laishiba mimshia bener otsür. Tang putu nungbo tasa balala melungsoa ministry nem tenla ajanga religious freedom maliba timtiba agütsübaji ibai lir, ta nem Laishiba agütsüteter," ta metetdaksü. Curry-i metetdaksü.

OLONG PAITEP # 6020

1			2			3			4	
			5		6		7			
8										
			9							
	10									
									11	12
			13				14			
15						16				

- | | | | |
|----------------------------|-------|-----------------------------|-------|
| TIPILEN | | LANGTSÜNGLEN | |
| 1. Anenzükdak ki | - (5) | 1. Reprangdaksü | - (4) |
| 3. Asür mangyimba | - (5) | 2. ___ ur | - (3) |
| 5. Temulung nung shisadang | - (5) | 4. Kiojen yangludak | - (6) |
| 8. T ___ lu | - (3) | 6. _____ ait | - (7) |
| 10. Takdang temalen | - (9) | 7. Nagaland nung ayong ka | - (5) |
| 11. Tesa ___ a | - (3) | 9. Küm kasa purtem | - (5) |
| 13. Ajungbena temulungjang | | 10. Tetsüng tajemetdak | - (6) |
| tongtonglatsü atu | - (5) | 12. ___ adenshi | - (4) |
| 15. Tejen lai nung tesayur | - (5) | 14. Tsünusenbongtsü adokdak | - (3) |
| 16. Tsüngsak-mopung | - (5) | | |

OLONG PAITEP # 6019 TELANGZÜBA

- | | |
|---|--|
| TIPILEN : | LANGTSÜNGLEN : |
| 1. Kasa, 6. Rangben, 7. Mait, | 1. Khu, 2. Süjak, 3. Onük, 4. Oba, |
| 9. Poktet, 11. Ati, 13. Atasa, 16. Rür, | 5. Anü, 6. Ratet, 7. Mozü, 8. Ita, |
| 17. Rajang, 20. Lanu, 24. Nüngjem, | 10. Tar, 12. Tinu, 14. Salem, 15. Aja, |
| 25. Süra. | 18. Anünü, 19. Tajü, 21. Ano, 22. Onü, |
| | 23. Kua. |



SOBANGBA O ALOKBA NA SENSAK ASEMER :
(Alokba aiür ka kanga meimba agi amoa mao okronger)

- Sobangba** : Temba, na yamai timtema mekazüi langka inyakang koto.
- Alokba** : Kechi inyakla?
- Sobangba** : Nai kilem kolak jagi tur nü ola tulutiba agi ayimtena "Ni Narola meimera nii" ta ayimokjangma.
- Alokba** : Yamaji inyakra lai ni meimtsüana?
- Sobangba** : Waa, lai ang maha yimer ajungai na "Alokba matuhang" ta ajatsü ati!.
- Lilir : WhatsApp**

TANÜBO NAI LANGZÜANG

Q. 'Nizamuddin Basti' ya India indang koba State/UT nung lir?
 [A] Uttar Pradesh [B] New Delhi
 [C] Bihar [D] Jammu and Kashmir

===== (Taruba adok nung onoki langzüksü) =====

YASHI ADOK TELANGZÜBA : Ministry of Social Justice and Empowerment

AO OSHI ANGAZÜKDAK:

TANÜ ANGAZÜKTSÜBA OJANG

Lipak
 (n) alu temang, ali tesem ka (an area of land)
 * Yimkümertemi **lipak** tajung bushia oa yim aküm.

Lipojen
 (n) akhi otsüren (ancient history)
 * Asen tsürabur **lipojentembo** zülua maka.



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA

- DECEMBER 08 NÜ ASOR TONGTIBANG NISUNG KAR:**
- Mary Queen of Scots (1542)
 - Peshwa of Maratha, Balaji Baji Rao (1720)
 - General Motors founder William Durant (1861)
 - French movie pioneer Georges Melies (1861)
 - Actor, politician Dharmendra (1935)
 - Actor James MacArthur (1937)
 - Rock and Roll Hall of Fame member Jim Morrison (1943)
 - Actress Sharmila Tagore (1944)
 - Rock and Roll Hall of Fame member Gregg Allman (1947)
 - Writer Bill Bryson (1951)
 - Actor Kim Basinger (1953)
 - Irish singer/songwriter Sinead O'Connor (1966)
 - Rock singer Corey Taylor (1973)
 - Rap artist Nicki Minaj (Onika Tanya Maraj) (1982)
 - Actor AnnaSophia Robb (1993)
 - Indian Boxer Shiva Thapa (1993)

SUDOKU # 6061 TELANGZUBA # 6060

5	6							2	7	6	9	4	1	3	5	8
8	1					5	4				4	9	8	3	7	5
		2	8	3	5		7				5	1	3	6	2	8
	2	6		9		8		5			6	3	4	8	9	2
		9	5			2		6			9	8	7	1	5	4
1		8	3			7	9				1	2	5	7	3	6
	8	5					6	9			7	4	1	2	8	3
		1	4			3	8	2			8	5	9	4	6	7
2	3	4	9		6		5				3	6	2	5	1	9

OJANG LUTEP # 5607

- AMTA :
- TSTAZÜÜ :
- ANGAMA :
- UBSAYA :
- GIJA :
- ENAS :
- NELTAA :
- JANJENG :
- ZÜKKÜMETSÜ :
- OKMAK :

OJANG LUTEP TELANGZÜBA # 5606

LENDONG ATALOKDANG MASÜ MAPANG AJAK NUNG TSÜNGREM DEN TESENDAKTEP YUANG

TAN HOPTA ATEMA - KOMA SÜLA ?

Q. Kisüjensü dang agiba osettem aser asen taküm atema nüngdakba chiyongtsü aser osettem ajak asenoki asen nisungtem dang nungi dang alitsüsa, ajungshitepa, lanurtem nem item mapatemji tenzükdaksü nunga koma süla ?



Gorakhpur nung fertilisers factory ka aser development project balala lapoktsüba mapang Ato Kilonser Narendra Modi-i o jembiba noksa nung angur.

PM Modi-i BJP MP tem dang parliament nung teti adentsü tuyu

New Delhi, Luchii/ December 7 (Agencies): Ato Kilonser Narendra Modi-i Mongolbarnü, tang agia aliba Winter Session nung par party züngsemtem teti arua shilem magiba atema aitsüogo, ta iba ken o jangja alirtemi ANI dang ashi.

Ato Kilonseri Bharatiya Janata Party züngsemtem dang pei tata House nung teti arua adentsü tetuyuba agütsüogo. Paisa, MP temi teti shilem magira temelenshi adoktsü akok ta shiogo.

Ato Kilonser-i ashiba agi, külem Parliament züngsemtem den tanur den jembir ama mejembiner. "Modi-i MP tem

dang Parliament nung teti arua adentsü aiben shiogo. Paisa, MP tem den tanur den jembiba ama mejembiner, ta ashi. Pai, parnok House nung teti arua shilem magira temelenshi adoktsü akok ta shiogo," ta ken o jangjaa alirtemisa ANI dang ashi.

Modi-i iba olen ya Mongolbar anepdang BJP MP tem parliamentary senden nung jembia liasü. Iba ya Parliament Winter Session nung mezüngbuba BJP MP tem parliamentary senden liasü.

BJP parliamentary senden ya Dr Ambedkar International Centre, New Delhi nung amen. Iba senden nung Union

minister tem rongnungi Amit Shah, Piyush Goyal, S Jaishankar, Pralhad Joshi aser Jitendra Singh aser BJP national tir Jagat Prakash Nadda nungeri shilem agia liasü.

Mongolbarnü Rajya Sabha aser Lok Sabha naprongla junga magiteti aiben anena liasü. Rajya Sabha ya Bodhbarnü tashi magitsü tetuyuba agütsüogo. Opposition temi mapa nungi anentsür aliba MP 12 meyipa anir arutsü atema akhangba ajanga senden tesunep nung magiteti arudar.

Opposition MP temisa session aiben adjourn asüba, parliamentary minister tem den sensaksemogo.

Rahul Gandhi-i Centre dang temenok agütsütsü akhang

New Delhi, Luchii/ December 7 (Agencies): Congress lenir Rahul Gandhi-i Mongolbarnü Lok Sabha nung aluyimertem ken o dak sendakba nung Centre sorkar aitsüogo aser Centre indang aluyimba ozüng anema longkak aitba mapang asüba aluyimer kinungertem nem temenok agütsütsü khangogo.

"Ni aluyimertem nem parnok temeden agütsüdaktsüner, parnok nem temenok aser mapa dena agütsütsüla," ta Congress MP yagi Lok Sabha nung ashi.

Aluyimba ozüng anema longkak aitba mapang aluyimer asüba indang data kecha yua maliba atema Centre aija Rahul Gandhi-i, longkak aitba mapang aluyimer 700 shi süogo, saka sorkar ket nung iba indang data mali ta ashi.

Pai ashiba agi, pai Punjab sorkari asür kinungertem nem teyari agütsüba aser Haryana nungi aluyimertem tenüng Lok Sabha nung table asütsü.

"Longkak aitba mapang aluyimer 700 shi süogo. Ato Kilonser-i linük nung aliba nüburtem aser aluyimertem dang tatok meshiogo. Pai aibelenba nangzükogo. November 30 nü Agricultural Minister (Narendra Singh Tomar) dang longkak aitba mapang aluyimer kwi asü ta asüngdang, iba mapang pai data kecha mali ta langzü," ta Gandhi-i ashi.

Maneni paisa, Punjab sorkari asür kibongtem nem teyari sen lakh 5 (ajak nem) aser mapa agütsüogo, ta ashi.

Mongolbarnüsa Rahul Gandhi-i, aluyimba ozüng anema

longkak aitba mapang asür kinungertem nem temenok agütsütsü khanga Lok Sabha nung adjournment motion notice ka benokogo, ta source balalai ashi.

Iba dak sendakba nung sorkari parliament nung taoba mapang ashiba agi, longkak aitba mapang aluyimer asüba indang parnok mangaoka mali anungji temenok agütsütsü asoshi ken o kecha mali.

Kasa mapang nung Centre sorkari aluyimer dak sendakba nung ken o balala benoka aliba telangzüba magütsü tashi aluyimertemi longkak aitsü, ta Samyukt Kisan Morcha (SKM)-i Honibarnü sangdongogo.

Parliament winter session ya November 29 nü tenzük aser December 23 nü tembangtsü.

Sunil Arora IDEA nung adentsü jaokogo

New Delhi, Luchii/ December 7 (Agencies): Taoba chief election commissioner (CEC) Sunil Arora, International Institute for Democracy and Electoral Assistance nung board of advisers nung adentsü jaokogo, ta Election Commission of India-i Mongolbarnü ashi. Iba telok dang ya International IDEA ta-a ajar.

International IDEA ya 1995 küm amenok. Iba telok ya intergovernmental organization ka lir koba Stockholm, Sweden nung amenoka lir aser parnok nukjidongji alima ajunga nung sustainable democracy nungita yaritsü atema lir.

"Iba institute ya board of advisers 15-i nungita yarir, shirnok lenla balala nung mongintem lir," ta ECI-isa ashi.

International IDEA nung tang continent ajak nungi züngsem 34 lir.

Arora ya December 2018 nungi April 2021 tashi CEC liasü. Pai iba mapa bena aliba mapang 2019 küm 17buba Lok Sabha general election agi aser iba den assembly aser bye-election aika agiogo.

Arora ya 1980 batch Indian Administrative Service (IAS) officer ka lir, aser pai taoba mapang Centre sorkar aser Rajasthan sorkar kübok tongtibang department tem nung tekolak mapa inyakogo.

ECI-i ashiba agi, Arora lenisüba nung commission-i digital programme tajungba kuma yanglushia electors million 930 dak tema indang unified database ka yanglu aser linük ajunga nung helpline-a amenoka liasü.



UP Assembly elections 2022 matong tsüngda 'Parivartan Sandesh' rally nung Samajwadi Party tir Akhilesh Yadav aser Rashtriya Lok Dal (RLD) tir Jayant Chaudhary nati shilem agiba noksa nung angur.

Tarutsü atema telemtetba agitsü atema aluyimertem Dec 8 nü senden amentsü

New Delhi, Luchii/ December 7 (Agencies): Tang longkak aita aliba aluyimba lokti-i Mongolbarnü ashiba agi, parnok takhangba trok agütsür aliba dak sendakba nung Centre telangzüba dak parnok arendaka bilemer aser December 8 nü taruba jenjang agitsü atema senden ka amentsü telemtetba agiogo.

Mongolbarnü Samyukt Kisan Morcha-i, Centre telangzüba sensak asemtsü atema senden ka ayongzüka agi aser ashiba agi ken o kar ano bangdaka lir. "Onok takhangba dak sendakba nung sorkari telangzüba agütsüba nung onoki onok tebilemba kar aser temulung masüba lemsatepogo," ta SKM-i ashi.

Senden tembangba sülen osangbenertem den sensaksemba mapang Bharatiya Kisan Union (BKU) lenir Rakesh Tikait-i ashiba agi, Centre-i aluyimertem takhangba ataloktsütsü nangzükogo, ajisüaka ken o mejangja.

"Onok tetsübu kar lir, koba asüng 2 ako nung senden amenba mapang sensak semtsü. Onok kechaia maotsü, onok idaki dang alitsü," ta Rakesh Tikait-i ashi.

Longkak ait anenba sülenang ken o tem agitsü ta sorkari ashiba onoki

magizütsü, ta parnok ashi.

Ato Kilonser Narendra Modi-i taoba ita aluyimba ozüng asem aginba sangdongba sülen aluyimertemi takhangba trok agüja liasü.

Aluyimertem takhangba tongtibangtibaji Minimum Support Price (MSP) system atema legal guarantee ka akhangba ya lir.

Maneni parnok Electricity Amendment Bill agintsü, Air Pollution Bill nungi penalty section agintsü, Union minister of state for home Ajay Misra Teni mapa nungi agintsü aser aputsü, aluyimertem anema ken o taila benoka alibatem agintsü, asür kinungertem nem teyari agütsütsü aser aluyimer asürtem atema memorial ka asoshi khangogo.

Farmer union tem dangi shiti ka nung Centre-i MSP ken o sensak asemtsü atema committee ka tentetsü kong SKM-ia shilem agitsü mulung agizükogo.

Centre-isa, longkak ait anenba sülen UP aser Haryana sorkari aluyimertem anema benoka aliba ken tem ajak agintsü, ta shiogo.

State anapronglai longkak aitba mapang asüba aluyimer kinungertem nem temenok agütsütsü mulunga agizükogo, ta Centre-i ashi.



Congress Committee office, Lucknow nung Congress General Secretary Priyanka Gandhi lenisüba nung Planning & Strategy Committee senden amenba noksa nung angur.



France tir asoshi toktepsang Eric Zemmour-i Paris north tsütsü Villepinte nung nübuyim sentong mezüngbuba agiba sülen teka mükangba noksa nung angur. Taoba mapang French TV nung takotet nisung Zemmour ya April ita election agitsü aliba nung toktepsü sangdonger anogo ishika lir nübuyim tenzükogo.

Basra yimti nung bomb agi nisung aika pokset

Basra, Luchii/Dec. 07 (Agencies): Iraq south tsütsü Basra yimti nung bomb tesashi ka poka nisung pezü asü aser pezü yiru, ta Iraq mitkartemi ashi.

Mitkartemi Mongulbarnü sangdong ka nung ashiba agi, motorcycle ka nung tapoktsü oset inoktsür anir arua pokdaksü aser iba mapang anüngleni mokozü tanak atu.

Iraq security forces den sendaktepa aliba Security Media Cell ajanga ashiba agi, motorcycle anasa gari ana aliba nung mi adoka nisung pezü asü.

"Forensic nung takotet aser technical tsütsü mongintem iba

lendong ataloka tesem nung lir aser parnoki iba lendong tali tejangjaba metettsü," ta Security Media Cell nung tekolakba, Saad Maan-i sangdong ka nung ashi.

"Cell ajanga bushisüngdangba maparen tembangba sülen osang tali tejangja sangdongtsü," ta pai ashi. Iba lendong ya al-Jumhuri Hospital anasa al-Samoud lemjem nung atalok, ta sepai tanishir kati osangbener dang ashi.

Iba lendong agütsüba asoshi tenüng agir kata meliasü. Basra Governor Asaad al-Edani-ibo osangbener dang iba lendong ya Daesh (ISIL

mesüra ISIS) yimya nung lir, ta ashi.

Iraq nung yimti tulu nung tesüsa ISIL temi lendong agütsüba ya July ita liasü, aser iba mapang takum bendanga agütsür bomb pokloksür kati Baghdad nung shishilempadak nisung 35 pokseta liasü.

Iraq nung totzü yangludak linük southern tsütsü bomb lendong ya kangabo majurur, talisa 2017 küm ISIL (ISIS) telungpur madak takok anguba sülen kanga ajema akum.

Ajisüaka October 10 nü parliament indang elections agiba sülen yimtenren tsütsü tensa mejungi akumer, kong Muqtada al-Sadr-i takok angu.

US-i Olympic Spirit anema inyaker: China

Beijing, Luchii/December 7 (Agencies): February ita Beijing Winter Games nung America nunger Diplomat temi shilem magitsü telemetba agiba ya Olympic spirit anema inyaksangshi ka lir ta China-i Mongolbarnü shiogo.

Biden administration-i Hombarnü iba osang sangdongba sülen China nungertemi iba telemetba agiba aija aliba mapang ka nung Foreign Ministry otongdar Zhao Lijians-i iba olen lemsatepa liasü. Zhao-i Hombarnü, china-i iba anema jenjang tapet agitsü ta shiogo, ajisüaka koba amala jenjang agitsü iba indang osang tejangja magütsü.

White House press secretary Jen Psaki-i Hombarnü osangbenertem dang ashiba agi, iba asayamung nung shilem agiba asayartem administration-i nongita yaritsü saka U.S. diplomat mesera ktdangsurtem meyoktsü.

Psaki-isa, human rights ajungkettsü atema U.S. bendanga agütsür lir aser iba asayamung atema kecha teyari magütsütsü, ta ashi.

Washington nung Chinese Embassy-i Twitter ajanga, iba asayamung nung shilem magitsü

ayongzükba yimden yimsüsürtem ya parnok ajangzüksü atema inyaker ta ashi.

"Item nisungtemi shilem agiba magibaji shingaia hau ta mali aser iba ajanga #Beijing2022 takok nung memungtettsü ta masü," ta embassy-i ashi.

United Nations dangi China indang Mission-i iba jenjang agiba ya yimden yimsüsüba nung jurila ajangzüksü atema lir ta shiogo. US-i sports politicize süner, telemdang adokdaksüner aser mangatettep adokdaksüner, ta mission-i ashi.

Washington-i kechi amala ktdangsur yoker lila aji mejangja aser Zhao-i Hombarnü ashiba agi China-i US jaoka mali.

Kasa mapang nung tanga linüktemia US sülen anidaksü manidaksü mejangja. Japan Ato Kilonser Fumio Kishida-i Mongolbarnü ashiba agi, Olympic Games aser Japan indang inyakyim temulungdang yur linük tejangraba dak ajemdaker Japan-i telemetba agitsü.

Japanese Chief Cabinet Secretary Hirokazu Matsuno-i,

diplomatic boycott tetezü ya kechiar mejangja aser tensa kanga junga asadanger mapangtong nung ktdangsurtemi shilem agitsü magitsü aji lemtettsü, ta ashi.

Japan-i Beijing Winter Games ya, Olympic aser Paralympic Games principle tem dak ajemdaker yimjung benjung ka ama amungtsü imlar ta Matsuno-i ashi.

Aung San Suu Kyi küm ana dang tepuokdak ayutsü

Naypyidaw, Luchii/December 7 (Agencies): Myanmar indang junta tekolakbai civilian lenir Aung San Suu Kyi nem taitok agüja la küm pezü tepuokdak ayutsü obendang agütsüba küm ana dang kümtsüogo. Military anema inyaksü ajungmesoba aser Covid inyakyim sülen manidakba atema la küm pezü tepuokdak ayutsü obendang agütsür liasü.

Myanmar court kati Hombarnü Aung San Suu Kyi küm pezü tepuokdak ayutsü obendang agütsü. Ajisüaka Myanmar state TV sangdong ka ajanga ashiba agi, la küm pezü tepuokdak ayutsü obendang agütsüba ya küm ana dang kümtsüogo.

Arishi küm 76 tain Suu Kyi ya February 1 nü military-i sorkar atsüngdokba sülen sota yua lir.

Iba sülen la anema ken o aika benokogo, kong official secrets act nung aibelenba, bendanglen nungi walkie talkie tem bener aruba aser election

inyakyim nung aibelenba atema aitsüba densema lir. Item ken o tem nung la aia aliba ngutetra la küm aika tepuokdak ayutsü.

Hombarnü Suu Kyi ya, military anema nokdaksü ajungmesoba atema küm ana aser Covid inyakyim sülen manidakba atema küm ana tepuokdak ayutsü obendang agütsü, ta junta otongdar Zaw Min Tun-i AFP dang ashi.

Taoba tir Win Myint-a kasa ken o nung aija küm pezü tepuokdak ayutsü atema obendang agüja liasü, koba US-i kanga mejungi aitsüogo.

Obendang agütsüba sülen mapang tatsüka lir Junta tekolakba Min Aung Hlaing-i tenaprola nem taitok agüja küm pezü melena küm ana dang tepuokdaksü ayutsü temelaba agütsüogo, ta state TV sangdong ka ajanga metetdaksü.

Tenaprongla linük yimtiba Naypyidaw nung pei kidang dang küm ana ya süitemdaksütsü, ta kasa sangdong ajanga metetdaksü.

Burundi tepuokdak mi adok, nisung aika asü

Gitega, Luchii/Dec. 07 (Agencies): Burundi indang political capital, Gitega nung nisung tali yua aliba tepuokdak mi kitsük-kirong lendong tesashi ka ataloka nisung 38 asü, ta Vice President Prosper Bazombanza-i ashi.

Mongulbar anepdang 4:00 ako meta atalokba kitsük-kirong lendong nungya nisung 69 yiru aser ki-o-jen aika raksatsü.

Bazombanza-i senior minister ishika den lendong atalokba tesem ya semdanga liasü, saka mi adokba indang osang tejangjabo pai mashi.

Iba tepuokdak alir kati ashiba agi, yangji alirtem mi nung rongset, aser tenük kuli alirtemia kanga mejungi temang rongsar alirtem police aser army indang pick-up gari nung mozü kidangi bener ao.

"Milak jangruba ngua onok

takum rongsettsü ta onoki ayimtena liasü, saka police temi onok aliba kishi lapoktsü memolung aser itemji parnok nem totuyuba agüja lir ta tanükertemi ashi," ta tepuokdak alir kati osangbener dang phone ajanga ashi.

"Ni komaser jenbuar ni memetet, saka tepuokdak alir aika rongsetogo."

November ita tatami iba tepyokdak ya nisung 1,500 dak tema liasü, ta ktdangsurtemi ashi, kong shidakba agi nisung 400 dang ayutsüsa yanglu.

Tepuokdak alirtem ya timba teburtem lir saka yangji tetsürtem asoshia balaka yua lir.

Gitega nung kasa tepuokdak ya August ita nunga kitsük-kirong lendong ka ataloka liasü, ta interior ministry ajanga ashi.

Iba lendong ya electrical short-circuit nungi tenzük aser yangji asü-amar meliasü.



1989 küm Ecole Polytechnique Montreal lendong nung asürtem nisung 14 nüngtem nung Montreal nung sentong ka agiba mapang tangokba noksa nung abelen nungi Sophie Gregoire, Canada Ato Kilonser Justin Trudeau, Montreal Mayor Valerie Plante, lendong nungi takum kumzükter Nathalie Provost aser Quebec Premier Francois Legault nungertem angur.

Atangji tajung aser taochi kü arishi tepiyong kü sülen anitaksü, aser ni kibuba kidang teti alitsü.
Tenüngsang Ken 23:6



1920 - 2021

Kodanga amadoktsü makokba tsürabur asür **Limasangba (Samuel)** Changki ajungbena iba akümü toktsür or onok mangyim jashi mapang kija kibong arogo aser lokti, rongsen aser sarasadem agi onok nungita yaritepogo, nenok ajak dang onoki kanga pelaba metetdaksür.

Asen tulusang Tsüngremi nenok mapa tajung atema maneni moajangma ta sarasademtsür.

Temeim Chirurtem, Anük-Apang aser Semchisemnurtem.

MOBO Awards: Dave-i 'Album of the Year' angu

Luchii/December 07, 2021

(Agencies): MOBO Awards 2021 sentong nung Dave-i 'Album of the Year' award angu. Deobarnü (05.12.21) Coventry Building Society Arena nung MOBO Awards sentong agia liasü.

Arishi küm 23 tain rapper Dave-i pa indang LP tanabuba - 'We're All Alone in This Together' atema 'Album of the Year' award agizüka liasü. Ajsüaka, iba award dak alaka pai tanga category nung award mangu. Song and Video of the year, Best Male Act aser Best Hip-Hop Act category nung Dave-i nomination ngua liasü.

'Body' (remix feat ArrDee, Bugzy Malone, Buni, Darkoo, E1, Fivio Foreign & ZT) ken atema Tion Wayne & Russ Millions nati 'Song of the Year' award angu. Kasa mapang Millionz-i 'Lagga' atema 'Video of the Year' angu.

Küm 15 dak tema industry nung inyaka arur sülen, Grime star Ghetts-i mezüing MOBO Award agizüka liasü. Ghetts-i Best Male Act prize angu. Ano, Little Simz-ia iba sentong nung mezüing award angu; la nem Best Female Act award agütsü.

Central Cee nem Best Newcomer aser Best Drill Act naroküm agütsü. Skepta nem Best Grime Act aser Nigeria nung pop star Wizkid-i Best International Act aser Best African Act anaprongla agizük.

2017 küm iba sentong agir külen nungi taküm iba sentong mezüing live agia liasü. Küm ana (2018-2019) iba sentong magi aser 2020 küm virtual ajanga iba sentong agia liasü.

Taküm iba sentong ya Leigh-Anne Pinnock aser Munya Chawawa nati ketdangsüa agiogo. Kasa sentong nung Ghetts, Pa Salieu, Stefflon Don and Ms Banks, Bree Runway, Potter Payper, Tems, NSG aser Enny densema artist balalai iba sentong nung

shilem agiogo.

* **MOBO Awards 2021**

takok angurtem:

- Album of the Year: Dave - 'We're All Alone in This Together'
- Best Female Act: Little Simz
- Best Male Act: Ghetts
- Best newcomer: Central Cee
- Song of the Year: Tion Wayne & Russ Millions - 'Body' (remix feat ArrDee, Bugzy Malone, Buni, Darkoo, E1, Fivio Foreign & ZT)
- Video of the Year: Millionz - 'Lagga'
- Best Grime Act: Skepta
- Best R&B/Soul Act: Cleo Sol
- Best Hip-Hop Act: D Block Europe
- Best Drill Act: Central Cee
- Best International Act: Wizkid
- Best Performance in a TV Show/Film: Michael Ward - Franklyn in 'Small Axe'
- Best Media Personality: Chunkz & Yung Filly
- Best Gospel Act: Guvna B
- Best African Music Act: Wizkid
- Best Reggae Act: Shenseea
- Best Jazz Act: Sons of Kemet
- Best Producer: Jae5

Wokha nung World Soil Day mungogo



Wokha, Luchii/December 07, 2021: World Soil Day anogomung bilemtetta, Mongolbarnü (07.12.2021) District Soil Conservation Office, Wokha-i "Farmers Mela" sentong ka ayonga agiogo. Iba sentong nung adenertem külemi tangokba noksa ka yangi angur.

Wokha, Luchii/December 07, 2021 (TYO): World Soil Day anogomung bilemtetta, Mongolbarnü, District Soil Conservation Office, Wokha-i Community Hall, Soil Colony, Wokha nung "Farmers Mela" sentong ka ayongzüka liasü, ta sangdong ajanga metetdaksü.

Iba sentong nung DSCO Wokha, Lidemo Murry-i, küm shia World Soil Day ya December 05 nü amunger aser ali (soil) indang tongtibangtem nung tekümdangtsü osang sangoktsütsü nükjidong nung iba sentong agir, ta ashi.

Murry-i ashiba agi, ali temo sama aoba ya asen meküta aliba libajen asoshi tebilemstü tuluka aser iba anogomung (World Soil Day) ajanga 'soil

resources' tajungtiba achayangtsü atema nüburtem longjemdaksür aser lenmang tajungtiba bushitsü asoshi pei tebilemba lemsateptsü maongka agütsür.

'Soil management' indang nung jembiba mapang, Murry-i, ali kümzüka ayutsü aser iba nungi tsünüsembongtsü timba züsentettsü atema anepaluba inyakyim tasen bendenloka inyaktüsü, ta ashi.

Kasa sentong nung, JSCO, Wokha, Nzanbeni N. Jami-i, Soil Health Card (SHC) indang tongtibangtem nung ajemdaker jembiba liasü.

Jami-i, ali temo jenjang asadangtsü/metettsü atema SHC ya amshir aser tsünüsembongtsü yokba/alu

inyakba ajanga ali temo agimaba/ali raksaba indang metettsü asoshi amshiba mapang, SHC yagi ali jenjang (soil health indicator) aser iba dak sendakba timtem sayur, ta metetdaksü.

Lai ashiba agi, SHC ya küm asem atema amshitettsü aser aluyimba nung tajangzüik alitsü atema iba maongka agitsü asoshi lai aluyimertem ajungshia liasü.

Maneni, technical session ya District Soil Testing Laboratory Wokha nung agia liasü, kong soil sample bendenba aser soil tendangba yimyatem sayua liasü. Iba sentong nung adener aluyimer ajak nem SHC card lema agütsüogo, ta kasa sangdong ajanga metetdaksü.

NSUD, DENSU & NPMHR temi khu khua aitsür

Dimapur, Luchii/December 07, 2021 (TYO): Tesüiba anogo ishika tejakdang, December 04 aser 05, 2021 nü Mon district kübok Oting yimtsüing aser Mon Headquarter nung tai malir Naga nung 14 tashi armed forces inyakyim ajanga taochi mesayui tepsetba osang angashia Naga Students Union Delhi(NSUD), Delhi Eastern Nagaland Union (DENSU) aser Naga Peoples Movement for Human Rights, Delhi (NPMHR) tem kanga aoksar aser jashir, ta sangdong ka

ajanga metetdaksü. Tai malir Naga nung tepsetba ya küm aika AFSPA kübok Naga nung rishikangshia aser timtema arubatem temai adokba jakdaka sayur.

Item tentet (NSUD, DENSU & NPMHR) ajanga Paramilitary commandos aser Assam Rifles temi taochi mesayui inyakba maparen khu khua aitsüba mapang, ochi obendang atema onoki Konyak kin nungittsü nangzükogo aser asür kibongtem den mangyim

jashi lemsatep.

Ochi obendang atema onoki longjemer raratsü. Asür nem akhüm agütsütsü asoshi, Hombarnü (06.12.2021) Nagaland House, New Delhi nung item tentet yagi Candlelight vigil service ka ayongzüka liasü.

Meimchir shisatsü agi magizüksüsa Indian Armed Forces-i inyakba maparen aitsüba mapang, item tentet ajanga AFSPA agientsü asoshi India Sorkar dang mepishiogo, ta kasa sangdong nung shia lir.



Imphal, Luchii/December 07, 2021: Mon District kübok Oting yimtsüing nung asürtem bilemteta Hombar nikongdang Regional Institute of Medical Science, Imphal nung Naga Medical Students Association (NMSA), Imphal Unit-i Candlelight vigil service agiba noksa yangi angur.

Test series atema South Africa squad sangdongogo

New Delhi, Luchii/December 07, 2021 (Agencies): India aser South Africa tsüingda taruba Test series asem, koba December 26 nung tenzüksü, iba Test series atema Mongolbarnü South Africa-i asayar 21 squad sangdongogo. Covid indang variant tasen - Omnicron dak sendakba nung tebilemba adokba ajanga anogo atsülangja arur sülen, iba Test asayatsü lemtetogo.

South Africa squad nung Dean Elgar-i anir asayatsü, kong taoba mapang Test asayar talisa Aiden Makram, Quinton de Kock, Kagiso Rabada aser Anrich Nortje nung squad nung dena lir.

Temba Bavuma, shibai T20 World Cup nung South Africa atema captain inyak, Test team nung pai vice-captain ama yaritsü.

India aser South Africa na tsüingda Test series tenzükta Centurion nung Boxing Day asayatsü. 'New Year's Test' ya sangküm January 3, 2022 nungi Johannesburg nung asayatsü aser January 11, 2022 ningi Cape Town nung iba series final asayatsü.

India, shirnoki South Africa nung Test series ka danga

kokdanga mali, aruya aliba Test series atema ano squad mesangdong lir. Mezüingbo India aser South Africa na tsüingda December 17, 2021 nungi Tests 3, ODIs kar aser T20Is 4 asayatsü renem, saka Covid variant tasen dak sendakba nung board anapronglai iba tour atsülangtsü asoshi telemtetba agi.

Taküm June ita West Indies nung South Africa-i series ana takok anguba sülen, parnoki iba Test series nung asayatsü terenemba lir. West Indies den asayar külen nungi South Africa-i Test cricket ka nung danga shilem agidanga mali.

"Taküm June ita West Indies nung junga asayatem asadanga National Selection Panel-i kasa telok nungi asayatem shimogo aser tanga asayar asem (West Indies Test nung masayatem) bendenlokogo," ta CSA-i ashi.

Taruba Test nung fast bowler temji Kagiso Rabada, Anrich Nortje aser Lungi Ngidi nung asyatsü aser parnok den yaritsü atema Duanne Olivier bendenlok.

2019 küm February ita Gqeberha nung Sri Lanka aser South Africa na asayaba mapang Oliver-i Test asayamung nung tesüsa shilem

agia liasü.

Arishi küm 29 tain Oliver-i CSA Four-Day Series nung tanaben ajemoka asayaogo aser taküm team nung wicket timba agir rongnung pa asütsü. Oliver-i külem team nung Simon Harmer dang nungi wicket timba (8) agia lir. Innings 8 nung Olivier-i wicket 28 (average 11.14) agiogo aser innings ka nung pai wicket 5/53 agia lir.

*** South Africa indang Test squad:**

Dean Elgar (captain), Temba Bavuma (vice-captain), Quinton de Kock (wicket-keeper), Kagiso Rabada, Sarel Erwee, Beuran Hendricks, George Linde, Keshav Maharaj, Lungi Ngidi, Aiden Markram, Wiaan Mulder, Anrich Nortje, Keegan Petersen, Rassie van der Dussen, Kyle Verreynne, Marco Jansen, Glenton Stuurman, Preenelan Subrayen, Sisanda Magala, Ryan Rickelton, Duanne Olivier.

*** India aser South Africa tsüingda Test Series asayatem:**

- 1st Test - December 26 to 30 (Centurion)

- 2nd Test- January 3 to 7 (Johannesburg)

- 3rd Test - January 11 to 15 (Cape Town)

December 26 nungi I-League asayatsü

New Delhi, Luchii/December 07, 2021 (Agencies): Taküm küm indang I-League season ya December 26 nü nungi tenzükta Kolkata nung asayatsü. Iba asayamung tenzükta Manipur indang TRAU FC aser All India Football Federation indang Indian Arrows tsüingda asayatsü.

I-League match tem tesem asem -- Mohun Bagan Ground (Kolkata), Kalyani Stadium aser Naihati Stadium nung asayatsü.

Tan season nung team tasen asem - Sreenidi Deccan FC (Andhra Pradesh), Rajasthan United FC aser Kenkre FC (Kolhapur) agi shilem agiba angutsü. Item team densema, taküm I-League nung team 13 kümügo.

Team ajak den iba asayamung nung shilem agir referee, official aser volunteer tem Kolkata kübok hotel balala pezü - bio-bubble nung amungtsü.

"Bio bubble telung nungi saisapong asayamung ayongzüksü asoshi AIFF-i takok ngua achaayanga aruogo aser iba League nung shilem agir asayar, referee aser tangartem ajak maneni

kümüzükta ayutsü asoshi inyakner," ta AIFF Leagues CEO Sunando Dhar-i ashi.

"Iba League nung külem sendaktepa alir ajak dang onoki pelaba lemsateper, kechiyong season ka atema team 13 tashi bio bubble nung ayutsü aser senotsü den osettsüset achaayangtsü asoshi parnok teyari ajanga ajak takok ngua inyaka arudar," ta Dhar-i ashi.

Qualifier nung mezüing aser tanabuba jenjang ajangzüksü sülen, Rajasthan United FC aser Kenkre FC naprongla I-League nung denogo.

Iba asayamung format nung renemba ama, league indang Phase 2 nung group ana melemsadang Phase 1 - round-robin format nung team shia team ajak den ataa asayatsü. Temaba team 7 tashi Group A nung adentsü aser table punglanglen alir team 6 tashi Group B nung atatsütsü.

Maneni, Phase 1 temer sülen, ano single leg round-robin format nung group shia indang team temi team ajak den asayatsü. Group A nung takok angur team shimtsü asoshi tokteptsü aser Group B team tem 'relegation' atema asayatsü.

ATP Cup atema Serbia squad nung Djokovic denogo



Sydney, Luchii/December 07, 2021 (Agencies): Sangküm January ita ATP Cup asayamung atema Serbia Squad nung Djokovic densemer asünung, Sydney nung pai season tasen asaya tenzüksü akok. Australian Open tayongertemi Covid-19 vaccination atema temzüing takang renemer lir, saka ATP Cup asayamung atema 20 ben Grand Slam takok angur Djokovic squad nung züingokogo.

Covid-19 vaccine agitsü asoshi Australian Open tayongertemi renemer aliba temzüing nung world no. 1 Djokovic-i telangzüba magütsü lir, saka sangküm January ita Sydney nung tebur asayamung ATP Cup atema Serbia team nung pa asayatsü terenemba lir.

Djokovic, shibai taoba asayamung asem densema Melbourne Park nung title 9 tashi koka lir, pai tanü tashi Covid-19 vaccine agi/magiba dak sendakba nung osang tejangja agüja mali. Australian

Open asayamung tayonger Tennis Australia-i, Melbourne nung tokteptsü asoshi asayar ajaki vaccine agitsüla ta nenshia metetdaksüogo.

Vaccine magii Sydney nung ATP Cup asayatsü atema Djokovic dang melatsü/memelatsü asoshi ano osang tejangja ka mali. Djokovic-i vaccine agi yongjia, Sydney tonga aruli iba asayamung metenzükdang anogo 14 tashi pa quarantine asütsü.

3buba ATP Cup team asayamung atema Mongolbarnü Sydney nung 'draw' agia liasü aser iba asayamung tayongertemi ashiba agi, Djokovic-i anir top seed Serbia team ya Group A nung Norway, Chile aser Spain den ataja lir.

Spain atema Rafa Nadal masayatsü asünung, Serbia aser iba asayamung atema Djokovic-i shilem agiba ya kanga tajangzük asütsü. 20 ben Grand Slam takok angur Nadal ya taküm küm tetenzüklen nungi terberem timtem ajanga

kangshia arudar. Aji masüing Nadal tetsüing nung timtem aliba ajanga Wimbledon aser Tokyo Olympics nunga pa masaya.

Arishi küm 35 tain Nadal, shibai August ita Citi Open nung tesüsa asayaogo, sangküm Australian Open atema asayamung tanga ka nung shilem magidang tan ita Abu Dhabi kübok exhibition asayamung ka nung pai shilem agitsü tebilemba lir.

2022 ATP Cup nung team 16 agi shilem agitsü aser January 1 nungi 9, 2022 tashi Sydney Olympic Park kübok tesem ana nung lemsar ayongzüksü. Iba asayamung nung shilem agirtemi senpet \$10 million atema tokteptsü.

Taoba asayamung takok angur team - Russia nung world no. 2 aser U.S. Open champion Daniil Medvedev-i anir asayatsü. Russia team ya taküm finalist Italy, Austria aser tayonger Australia den group ka nung ataja lir. Ajisüaka, Australia team nung Nick Kyrgios masayatsü.

Group pezü nungi takok angur team shia semi final atema temsüa akümtsü.

* Group A - Serbia, Norway, Chile, Spain

* Group B - Russia, Italy, Austria, Australia

* Group C - Germany, Canada, Britain, United States

* Group D - Greece, Poland, Argentina, Georgia

Mateo Kovacic dak Covid-19 putet



London, Luchii/December 07, 2021 (Agencies): Chelsea midfielder Mateo Kovacic tetsüing yiruba sülen tanaben training-i shialanger anogo ka dang lir pa dak Covid-19 putet, ta Mongolbarnü Manager Thomas Tuchel-i osang jangjatsüogo.

Bodhbarnü, Chelsea aser Zenit St Petersburg tsüingda Champions League asayatsü aser iba match nung Kovacic-i shilem magitsü.

Croatia nung Kovacic, shibai League pungo nung shilem agiogo, pa temang nung timtem aliba ajanga tetoktepa ajak nung Chelsea indang

tesübuba match 8 nung masayatetba sülen, October ita nungi pai iba League nung mezüing asaya liasü.

Tuchel-isa, iba asaya (Chelsea aser Zenit St Petersburg) nung Jorginho aser N'Golo Kante nati shilem magitsü, ta osang jangjatsüogo.

Honibarnü West Ham nung tamakok anguba sülen, team asalentong tebilemstsü aser Bodhbarnü Champions League match atema asayatem melentsü/memelentsü dak sendakba nung Manager Tuchel dang asüingdanga liasü.

"Yashi (Hombarnü) training nung Mateo-i jangrangra shilem agi aser team nung pai tanaben asayatsü renem dang pelaa liasü, saka tia makai tanü pa dak Covid-19 positive putet," ta osangbener dang Tuchel-i ashi.

Champions League indang knockout stage atema Chelsea team qualify süogo aser Group H nung Chelsea aser Juventus naprongla temaba jenjang nung point kasa shi lir (12). London club - Chelsea-i Malmo madak takok ngura parnoki Juventus' ajangetta group nung temaba jenjang tongtetsü lenmang lir.

BILEMDANGANG

"Tanishiri pei nütsüing memetetra pai pa shibar mejangja."